

# Meglierar la situaziun dals medis da chasa

## Il parlament accepta la cuntraproposta

DA LUCAS DEPLAZES / ANR

■ **Ier ha il parlament federal acceptà cun in cler votum la cuntraproposta a l'iniziativa che pretenda in rinforz substanzial da la situaziun dals medis da chasa.** L'iniziativa dals medis «Gea a la medischina dals medis da chasa» è resortida da la situaziun nunc-tentaivla davart la remuneraziun da lur lavur e da lur responsabladad en

cumparegliaziun cun ils spezialists da la medischina. Sco quai che retscher-tgas demussan gudognan ils collegas-spezialists dapli ch'il dubel. In ulteriur motiv è stada la reduziun da las tarifas da labor tras il cussegl federal. Il 1. d'avrigl 2006 han ils medis da chasa organisà ina manifestaziun en scussal alv sin la piazza federala per protestar cunter lur situaziun. Sco resultat da questa acziun è resortida l'iniziativa «Gea a la

medischina da chasa», inoltrada in onn pli tard a la chanzlia federala cun passa 200 000 sottascripziuns. Cun questa iniziativa pretendan ils medis da chasa la garanzia d'in bun provediment medical da basa en tut ils territoris da la Svizra. In punct central da l'iniziativa è da francar en la constituziun federala il princip ch'ils medis da chasa èn da considerar sco l'emprim post da consultaziun en cas d'accidents, da malso-

gnas u tar dumondas da la sanadad publica. Plinavant pretendan ils medis da chasa prescripziuns concretas davart lur renconuschientscha ed in meglierament da lur situaziun professiunala e finanziaria.

### Ina cuntraproposta

Il cussegl federal ed il parlament van d'accord cun las pretensiuns dals medis da chasa, vulan dentant evitar in status spezial per ils medis da chasa en la constituziun. Els refusan perquai l'iniziativa e suttamettan al pievel ina cuntraproposta che tegna quint da las pretensiuns dals iniziants. Quella cuntraproposta prescirva explicit che la confederaziun ed ils chantuns èn responsabels da garantir a tut il pievel in provediment da basa d'alta qualitat. Confederaziun e chantuns promovon e renconuschon la medischina dals medis da chasa sco part integrala dal provediment da basa. La confederaziun formulescha prescripziuns davart la furmaziun supplementara per la medischina da basa e las pretaisas per la perfecziun e procura per ina indemnizaziun confurma a lur lavur e responsabladad. En ses «Masterplan» ha il minister da la sanadad, *Alain Berset*, già preschentà sias propostas che tegnan quint dals postulats sin maisa.

Ier ha il cussegl dals chantuns acceptà la cuntraproposta en la votaziun finala cun 43 cunter 0 vuschs ed il cussegl naziunal cun 140 cunter 49 vuschs. La votaziun finala d'ina cuntraproposta sto succeder otg dis avant las votaziuns finalas da l'ultim di da la sesiun. Questa cuntraproposta vegn suttamessa a la votaziun dal pievel ensemen cun l'iniziativa. Ils exponentes da l'iniziativa han dentant dà da chapir ch'els sajan prontos da retrair quella, sch'il parlament respectia lur pretaisas.



La situaziun dals medis da chasa vegn rinforzada substanzialmain.

KEYSTONE